



Sesida dals

13 da mars 2018

Communitgà ils

14 da mars 2018

Protocol nr.

189

Dumonda Tenchio

concernent la posiziun giuridica da «gruppas da gieu» che tgiran uffants en il chantun Grischun

Resposta da la regenza

Uffants e giuvenils dovran ina protecziun speziala e ston vegnir promovids en lur svilup ad umans independents e socialmain responsabels. La finamira da las purschidas per famiglias, per uffants e per giuvenils è quella da garantir la protecziun, il bainesser e l'integraziun sociala dals uffants e dals giuvenils. Las purschidas sustegnan las famiglias, ils uffants ed ils giuvenils, independentamain da la schlattaina, da la derivanza sociala, da l'appartegnientscha u d'impediments. En ina canorta d'uffants sco purschida da la tgira d'uffants complementara a la famiglia vegnan ils uffants da la vegliadetgna prescolara e scolara tgirads regularmain. Las purschidas promovon l'integraziun sociala e linguistica sco er il svilup dals uffants en la gruppa. L'assistenza po esser dividida en unitads d'in mez u d'in entir di. L'assistenza sustegna la cumpatibilitad da la professiun cun la famiglia. En ina gruppa da gieu han ils uffants tranter 3 onns e la vegliadetgna da scolina la pussaivladad d'emprender a far gieus, per regla durant paucas uras per emna. Las abilitads socialas dals uffants vegnan promovidas ed els emprendan a s'orientar en ina gruppa. La gruppa da gieu n'è betg primarmain fatga per la tgira d'uffants complementara a la famiglia.

L'art. 13 al. 1 lit. b da l'ordinaziun davart il plazzament d'uffants per la tgira e l'adopziun (OPUA; CS 211.222.338) fixescha ch'i dovra ina permissiun per manar ina instituziun, sche plirs uffants sut 12 onns vegnan recepids regularmain per l'assistenza durant il di (canortas d'uffants e chaussas sumegliantas). En l'art. 14 al. 1 lit. b da la lescha davart ils uffants confidads (DG 219.050) ha il chantun Grischun precisà ils criteris per l'obligaziun da dumandar ina permissiun. Per recepir uffants e giuvenils dovri ina permissiun, sch'i vegnan assistids durant il di u durant la notg il medem mument quatter u dapli uffants da la vegliadetgna prescolara u da la vegliadetgna da scola. Tenor l'art 14 al. 2 da la lescha davart ils uffants confidads èn servetschs che guardan d'uffants en instituziuns da vacanzas e da temp liber, en gronds negozis ed en centers da cumpra exceptads da l'obligaziun da dumandar ina permissiun.

Las purschidas per l'assistenza regulara d'uffants durant il di èn ozendi fitg multifaras. Ellas cumpiglian ultra da l'assistenza tras geniturs da di er centers dal di per uf-

fants, canortas, maisas da mezdi, gruppas da gieu e servetschs che guardan d'uffants. En la lescha n'èsi betg vegnì fixà, tge furmas da purschidas da la tgira en chasas da dimora che ston vegnir suttemessas a l'obligaziun. Per la dumonda, sche l'obligaziun da dumandar ina permissiun vala per ina purschida da la tgira en ina chasa da dimora, èn decisivs la purschida sco tala, il dumber d'uffants esters che vegnan assistids il medem mument, la durada da la purschida d'assistenza (uras per emna) sco er la regularitad da l'assistenza. La designaziun da la purschida n'è qua betg relevanta.

Purschidas sco gruppas da gieu èn purschidas nunbirocraticas che vegnan savens installadas e manadas en moda autonoma. Questas purschidas n'èn per regla betg primarmain destinadas a la tgira d'uffants sco tala, mabain plitgusch a la socialisaziun prescolara dals uffants. La purschida è savens limitada a paucas uras per emna. Tenor la pratica da blers onns, che vegn er applitgada en la gronda part dals chantuns, na tutgan questas purschidas betg sut l'art. 13 al. 1 lit. b OPUA resp. sut l'art. 14 da la lescha davart ils uffants confidads e na dovran perquai betg ina permissiun. Quai na vala dentant betg, sch'ina gruppa da gieu metta a disposiziun la medema purschida sco ina canorta d'uffants; en quest cas stuess la purschida vegnir qualifitgada sco tala.

Tar la dumonda a: Las gruppas da gieu n'han per regla betg la medema purschida sco las canortas d'uffants e na pon da princip betg vegnir consideradas sco purschidas da la tgira d'uffants complementara a la famiglia. Ultra da quai vegnan las purschidas – en cas da gruppas da gieu – messas a disposiziun ed utilisadas durant in temp cleramain limità, per regla durant paucas uras. Ellas n'èn perquai betg suttemessas a l'obligaziun da dumandar ina permissiun tenor la OPUA resp. tenor la lescha davart ils uffants confidads. Sche la purschida da la gruppa da gieu è dentant pli extendida e cumparegliabla cun quella d'ina canorta d'uffants, exista – independentamain da la designaziun – l'obligaziun da dumandar ina permissiun.

Tar la dumonda b: La regenza è pronta d'examinar ils proxims 2 onns – en concordanza cun la OPUA e cun la lescha davart ils uffants confidads – ils criteris che valan per l'obligaziun da dumandar ina permissiun.



En num da la regenza

Il president:

Il chancelier:

Dr. Mario Cavigelli

Daniel Spadin